

Leta Iviva Pita Le Rorori Utu iviva

Pita, iye Jisas ghalinae gharaghambi regha i roriya letake iyake. Ma vambe i variye enge e ghemba regha, ko iyemaenge va i variye provinsike thiyake wenji: Pontas, Galeisiya, Kapadosiya, Eisiya na Bitiniya (1:1) Valivanḡako thiyako noroke inanji e vanautumake iyake tine — Teki (Turkey).

Jisas le mare e ghereiye, theghathegha gheweto na umbolima e ghereiye amba Pita i roriya letake iyake. Va e mbanako iyako Rom lenji kin idae Nero i vakatha vuyowo wenjiya ralonwelonweghathi. Iya kaiwae letake iyake gharerenuwana laghiye Pita i dage wenji na thi ghatanaghathigha vuyowo ngoreiya Jisas (2:18-25; 3:13-22; 4:12-19). Na tembe ngoreiyeva, i vanuwoviringi Loi le mwaewo bwagabwaga kaiwae (5:12), na i vavurigheghengi na tembe thi vabobomangiva e ghanjithanavuko wolaghiye (1:15), na thi vakavakatha vakatha thovuye (2:12; 3:16). Iya kaiwae ra vaidiya ghandaghe vavurigheghe lemoyo e letake iyake e tine.

¹ Ghino Pita, Jisas Krais ghalinae gharaghambi, ya roriya letake iyake na ya variye i ghaona wenga, thavala ghemi Loi kaerova i tuthinga, na mbanake hu mebobwari e valivanḡangike

thiyake: Pontas, Galeisiya, Kapadosiya, Eisiya na Bitiniya.

² Ghemi Loi Ramanda le tututhi gharighariniye ngoreiya va le renuwanja, na i vabobomanga na hu meghaghathi e Une Boboma, na hu ghambugha Jisas Krai kaiwae va i mare kaiwami na Loi kaero i numotena lemi thari. Mbala le mwaewo na le gharemalili i riyevanjara gharemina.

Renuwanakiki memeghabananiye

³ Ra tarawe Loi na ghandi Giya Jisas Krai Ramae, kaiwae ghare i nja weinda na i giya yawalinda togha, i mena weya nariye Jisas Krai le thuweiru mare e tine.

⁴ Iya kaiwae ra renuwanakiki, ra woraweya ghamidi na ina e ghamwanda thovuyeko Loi i vivatharawe le nganga kaiwanji. Iyako ina e buruburu, na mane i vwatha, o i thari o i manemane.

⁵ E le vurigheghe tine Loi i njimbughathinga, na kaiwae hu lonweghathigha Krai le njimbukikiko iyako i yaku e ghemi. Iya kaiwae hu worawe e ghamwami vamoruko iya Loi va i vivatharaweko na ne i vaemunjoruna mbanja ele ghambako.

⁶ Thiyake kaiwanji hu warari, othembe e mbanjake thiyake hu numothari mbanja ubotu, kaiwae hu ru vuyowo thi ghanagha e tinenji.

⁷ Vuyowongike thiyake thi mena na thi vaemunjoruna lemi lonweghathina emunjoru moli na i laghiye kivwala gol. Gol ghavaemunjoruna ne i yomara mbanja thi nambu e ndighe, ko iye-maenge gol tene i thari. Ko lemi lonweghathina

ghaemunjoru moli ne i woranjiya tarawa, wwenyevwenye na yavwatata mbanja Jisas Krai ne i njoghama.

⁸ Othembe ma hu thuwe, hu gharethovu, na othembe ma hu thuwe e marami mbe hu lonweghathiva. Iya kaiwae weimi lemi warari memevoroniye moli ma valikaiwae ne e ghalinjanda ra utunja.

⁹ Kaiwae kaero hu vavaidiya lemi lonweghathina ghathovuye moli, unemina ghavamoru.

¹⁰ Vamoruke iyake kaiwae Loi ghalinjae gharautu va thi rovurigheghe na thi tamweya Loi le giya bwagabwagake iyake na thi utunja.

¹¹ Va thi mando na thi tamwe vaidi ne thembanja vara na ne ngoronga na i mena. Mbanjako iyako Krai Une va ina wenji na i vavatomwe na i dagedageraweya vuyowongiko iya Krai iye ne i ru wenji na i ghatanaghathinji na e ghereiye ghavwenyevwenye ne i yomara.

¹² Loi kaerova i woranjiya wenjiya ghalinjae gharautu, na budakaiya va thi vakatha ma thiye lenji thovuye kaiwae, ko iyemaenge ghemi kaiwami. Budakaiya vama thi utunja kaero mendava toto thovuye gharautu thi vathigiya e ghemi. Mbanja thi utunja Toto Thovuye, Nyao Boboma, i mena weya Loi e buruburu, i viva wenji. Na iya renuwanjake thiyake nyao thovuthovuye tembe nuwanjiko nuwaiyava thi ghareghare.

Ralonwelonweghathi lenji yakuyaku na yawalinji

¹³ Hu vivatha wagiya wenga kaiwo kaiwae na mbe ghamimberegha vara hu njimbukikinga. Hu woraweya ghamidi budakai ina e ghamwamiko na mwaewoko iya Jisas Krais ne i worangiyako.

¹⁴ Mbanja va i vivako mava e lemi ghareghare, iya kaiwae va hu vakatha thari ngoreiya lemi renuwajana. Ko noroke ghemi Loi le nganga. Thava tembe lemi yakuyaku ngoreiyeva va e mbanjako iyako.

¹⁵ Kaiwae Loi, iye i boboma, iyava i kulake e ghemi, tembe ngoreiyeva ghemi hu boboma e lemi vakathana wolaghiye tine.

¹⁶ Ngoreiya Buk Boboma, inja, “Kaiwae ghino ya boboma ghemi tembe hu bobomava.”

¹⁷ Thongo hunja Loi iye Ramami, mbala hu renuwajakiki Loi ma i valivalivanga. Lolo regha na regha ghatututhi ngoreiya le vakathako. Iya kaiwae mbe e lemi yavwatata weya Loi e lemi vakathana wolaghiye tine, e yawalimina ghambanja i ri rogga e yambaneke.

¹⁸ Kaiwae kaero hu ghareghare Loi kaerova i rakayathunga e ghamithanavu raraithari e tinenji iyava orumburumbumi thi valawengana. Loi kaerova i vamodonga na i rakathunga, ko mava i wo bigi tene i vwatha ngoreiya silva o gol.

¹⁹ Ko iyemaenge va i vamodonga Krais e madibae thovuye. Iye ngoreiya sip nariye ghatabo vondivondi na ma riwae regha i thari.

²⁰ Loi vama i tuthirawe amba muyai i vakatha

yambaneke, na kaerova i yomara ghemi kaiwami, e mbanangike momouwoniye thiyake.

²¹ Amalaghiniye i vakathanga na hu vareminja Loi, ko Loi iye va i vakatha na i thuweiru mare e tine na i giya vurigheghewe iyako kaiwae lemi vareminje na lemi renuwanakiki hu vatadiwa Loi.

²² Mbanake kaero hu ghambugha emunjoru, iya kaiwae kaero i vakathanga hu botewoyathu thari iya i vakowanangana. Iyake i vakathanga valikaiwami gharemi wenjiya lemi valiralonwelonweghathi, na hu gharethovu weya regha na regha e gharemina laghiye.

²³ Kaerova Loi, iye Ramami, i giya yawalimi togha. Iye mane i mare, memeghabaniye, na va i giya yawalimi e ghalinae thovuye, e yawayawaliye na ne i meghabana.

²⁴ Ngoreiya Buk Boboma le utu, ija, "Gharigharike wolaghiye ngoranjiya nana ne lenji thovuyeko ngoreiya jin. Mbanana nanako i yawowo njiniko i dobu.

²⁵ Ko iyemaenge Giya Loi ghalinae i meghabana." Utuke iyake Toto Thovuye, iyava thi utujana e ghemi.

2

Jisas iye vari vurivurighegheniye

¹ Iya kaiwae, hu viyathungiya thanavu raraihari; thama ghanjikwan o hu tabo taukwan o yamwakabu o thama hu utuutuvathari gharighari vavana wenji.

² Ghemi mbala ngoramingiya gamagai amba gunagunagha, nuwanjiko mbe ina vara e thu; nuwamina mbe inawe vara unemina ghae moli na i varara yawalimina. Thongo hu ghana ghaninga e yawayawaliye, mbala mbe hu mbuthumbuthu voro vara e yawalimina.

³ Ngoreiya Buk Boboma i worangiya, inja, “Kaero mbe ghamimberegha vara hu vaidi na hu ghareghare Giya iye i thovuye moli.”

⁴ Hu rakamena weya Giya Jisas Krais, iye vari vurivurighegheniye na e yawayawaliye na gharighari va thi botewoyathu na thinja ma e ghathovuye, ko iyemaenge Loi va i tuthi na iyako i thovuye moli.

⁵ Hu rakamena, ghemi ngoramiya vari e yawayawaliye na Loi i vakaiwonanga na i vatada ngolo boboma e yawayawaliye. Ghemi ne hu kaiwo Jisas Krais le vurigheghe e tine ngoreiya ravowovowo boboma Loi kaiwae na hu vakatha lemi kururuna e yawayawaliye na Loi i wararija.

⁶ Kaiwae Buk Boboma inja, “Kaerova ya tuthiya vari thovuye moli, ya worawe na Saiyon* i ndeghathiwe; na thela thongo i lonweghathi mane i monjina.”

⁷ Thela ghemi hu lonweghathi, varike iyake i laghiye moli e ghemi; ko wenjiya thavala ma thi lonweghathi: “Iya varike ravatavatadike va thi botewo kaiwae ma e ghathovuye kaero i tabona vari thovuye moli.”

* **2:6** Saiyonike iyake i mboromboro weiye Jerusalem. **2:6** Ais 28:16 **2:7** Sam 118:22

⁸ Na Buk Boboma tembe inava, “Varike iyake gharighari lenji ghamba thalativa, na variniye i vakathangi na thi dobu.” Thi dobu kaiwae ma thi lonweghathigha Toto Thovuye. Loi le renuwanja kaiwanji ngoreiye varako.

⁹ Ko ghemi tututhi gharighariniye, Kin le ravowovowongi na kaero hu tabo le vanautuma boboma na ghambereggha moli le gharighara ghemi. Kaerova i tuthinga na i kula rangiyanga thari e momouwoniye tine na hu rakarangi ele vamoru manjamanjalaniye na mbala hu vatomwe wenjiya gharighari vavana iya Loi le thovuyeko.

¹⁰ Mbanja va i vivako Loi mava le gharighara ghemi, ko e mbanake iyake kaero le gharighara ghemi. Va e mbanako iyako mava hu ghareghareya Loi, ko e mbanake iyake kaero hu wo le ghareviri.

¹¹ Ae wouna na valigharegharengu, ya nanjo e ghemi; ghemi bobwari na hu mebobwari e yambaneke! Thava hu ru mbunima na madibe lenji renuwanja e tine, thiye unemina ghathighiyangi na thi wowogaithi mbanake wolaghiye.

¹² Ghami thanavuna thiye ma thi lonweghathi e maranjina mbe i thovuthovuye vara mbala thembanja thi wonjowenga na thina ghemi thari gharavakatha, ne thi thuweya lemi vakatha na thovuye amba thi tarawe Loi mbanja ne i njoghama na i mbaro.

¹³ Giya e idae hu ghambuggha rambarombaro

lenji mbaro, ngoreiya Rom lenji Kin iye rambarombaro laghiye moli,

¹⁴ gawana regha na regha, iye i tuthingi na i bigirawengi na thi giya vuyowo wengiya thari gharavakatha na thi tarawengiya thovuye gharavakatha.

¹⁵ Kaiwae Loi le renuwana nuwaiya hu kiya ragoriwoyathu na numounouno ghaenji lemi vakathana thovuye kaiwae.

¹⁶ Hu yaku ngoreiye rakarakayathu gharighariniye, ko iyemaenge thava hu vakaiwona rakarakayathuna iyana na ngoreiya lemi varivoru na hu yabo thariwe, ko mbema hu yaku enge ngoreiya Loi le rakakaiwongi.

¹⁷ Hu yavwatata wanengiya gharigharike wolaghiye, gharemi wengiya lemi valiralonwelonweghathi, weimi lemi gharemararu weya Loi na hu yavwatatawana Rom lenji Kin.

Krais ghavuyowoko iye ghamba thuwathuwa

¹⁸ Ghemi rakakaiwobwaga, hu ghambungiya ghamigiyagiyana na hu vakatha yavwatata laghiye wengi. Thava mbe hu vakatha wengi enge thavala thi wovenga ghamwanji, ko tembe hu vakathava ngoreiye wengiya thavala thi bilinga.

¹⁹ Kaiwae thonjo kaero lemi renuwana ngoreiye na hu ghambugha Loi le renuwana, iya kaiwae hu ghatanaghathi ghavuyowo na viri ma lemi renuwana ngoreiye na hu vaidingi, Loi ne ghare e ghemi.

²⁰ Thongo thi vakatha vuyowo e ghemi kaiwae hu vakatha thari, ma e righerighe na ne thi tarawenga kaiwae hu ghatanaghathi vuyowoniye. Ko iyemaenge thongo hu vaidiya vuyowo kaiwae hu vakatha thovuye, na hu ghatanaghathi, iyana Loi i warari kaiwae.

²¹ Iyana iya Loi va i kulana e ghemi na hu vakatha. Krai va i ghatana viri kaiwami na i vakatha ghemi lemi ghamba thuwathuwa na hu ghambu. Mbala hu vakatha ngoreiya le vakathako.

²² “Mava i vakatha mun thari na ma kwan va i nderangi mun e ghae.”

²³ Mbanja gharighari thi utuvathariwe, mava i gonjogha wengi e utu raithari. Mbanja i ghatana viri, mava i vamararungi, ko le renuwanako wolaghiye va i woraweya Loi ghamidi, iye ratututhi thovuye moli.

²⁴ Krai ghamberegha e riwaeko va i wo la thari na i voro e kros vwatae, iya kaiwae e thari kaero ra mare na Loi le renuwanja e tine ra yakuwe. Kaiwae Krai va i mare e kros vwatae ghinda ra vaidiya yawalinda gathovuye moli.

²⁵ Ghemi va ngoramiya sip thi raka ghawe, ko iyemaenge e mbanjake iyake kaero mendava hu njoghama na hu ghambughu sip Gharanjimbunjimbu, na iye yawali gharanjimbukiki moli.

3

Ragheghe ghimoru na levo utuninji

¹⁻² Tembe ngoreiyeva ghemi ragheghe wanakau kaero hu lonweghathi, hu

vatomwenga emunjoru wenjiya lemi ghimoghimoru ma thi lonweghathi, mbala ghamithanavuna kaiwae thi wovatha Toto Thovuye utuniye. Ma valikaiwae ne hu vavurigheghenangi e lemi utuutu, ghamithanavu na lemi vakathana tembene i woranjiya wenji.

³ Thava ghamiyamoyamo ghathovuye kaiwae na hu vakatha umbalimi i thovuye, hu bigiraweya ghavatha thovuye e riwami na hu njimbo kwama ghayamoyamo thovuye,

⁴ ko iyemaenje ghamiyamoyamona thovuye mbala i mena e tinemina, ghavathana iya i meghabanana; thanavu gheneghenenjaneye moli, na iyake i laghiye moli Loi e marae.

⁵ E kamwathike iyake manabu wanakauniye mevivako, thiye va thi woraweya Loi ghamidi, thi vakavakatha ngoreiye na thi vatomwe moli wenjiya lenji ghimoghimoru.

⁶ Ngoreiya Sera, elaghiniye va i ghambugha le ghimoru Eibraham na inja ghagiya. Ghemi noroke Sera le nganga ghemi, thonjo hu vakavakatha thovuye na ma hu mararu mun bigi regha.

⁷ Ghemi, tembe ngoreiyeva, lenji ghimoghimoru, mbe hu yaku weimi lemi ghareghare emunjoru wenjiya lemi ovo, kaiwae wevo le vurigheghe ma ngoreiya ghimoru. Mbe hu yavwatata wanangi kaiwae thiye na ghemi ne hu wo Loi le giya bwagabwaga yawali moli. Hu vakatha ngoreiyako mbala Loi i vamboromborona lemi nanjonjina une.

Ghatanaghathi thovuye ghavakatha kaiwae

⁸ Ya govuna lo utuutuke, taulaghina ghemi e lemi yakuyakuna tine lemi renuwana regha, hu mando na hu vegharegharenga e ghaminamina, hu gharethovu wengiya lemi valiralonwelonweghathi, ghamithanavuna i udauda na hu gharenja.

⁹ Thava hu lithigha lenji thari e ghemi e thari na tembe ngoreiyeva lenji utuvathari e ghemi e utuvathari, iyemaenge hu nango weya Loi iye ghare wengi, kaiwae va i tuthi e ghemi na hu vakatha ngoreiye mbala hu vaidi Loi ghare wenga.

¹⁰ Ngoreiya Buk Boboma le worangiya, inja, "Thela thongo nuwaiya i vaidiya yawaliye ghathovuye na mbanja regha na regha ghare i warari, thava i utuutuvathari na thava i utu kwanikwan.

¹¹ I viyathu thari ghavakatha na i rombela thovuye ghavakatha, i mando na i rombela vanevane e yawaliye na e ghare.

¹² Kaiwae Giya Loi mbe ghare wengi vara thavala thi ghambugha le renuwana na i thombe lenji nango; ko iyemaenge i botewoyathungiya thari gharavakatha."

¹³ Thela ne i vakatha thari e ghemi thongo nuwamina i ghangowa thovuye ghavakatha?

¹⁴ Ko othembe ne hu vaidiya vuyowo thovuye ghavakatha kaiwae, ghamitarawa ne i laghiye moli. Ne hu ndemararu lolo regha o thava weimi lemi gharelaghilagi.

15 Ko e gharemina laghiye hu vakatha Krai ghayavwatata na hu vakatha iye Giya. Hu vivatha mbanake wolaghiye mbala valikaiwami hu thombeya the lolothan i vaitonga na hu vamanjamanjala budakaiya hu ghamaraghaoko e ghamwamiko weiye gharematuwo.

16 Lemi thombena e tine weiye lemi gharenja na riwouda, weimi lemi gharematuwo na manjamanjala mbala mbanja ghamithighiya thi utuvathari e ghemi, ghamithanavuna thovuye kaiwae, kaiwae ghemi Krai gharaghambu, lenji utuna tembene i vakathava ghanjimonjina.

17 Kaiwae i thovuye moli e ghemi thongo hu vaidiya vuyowo kaiwae hu vakatha thovuye, thongo iyake Loi le renuwana na ma ngoreiya thari ghavakatha.

18 Kaiwae Krai va i mare la tharike wolaghiye kaiwanji, mbanjararere na mbe mbanjara enge vara. Iye lolo thovuye na va i ndethinda, gharighari raraithari, mbala i vanguinda na ra raka weya Loi. Va i mare e mbunima na madibe, ko mbanja va i thuweiru na e yawayawaliye iye kaero nyaova.

19 Kaiwae iye nyao, va i wa na ve vavaghare wenjiya nyao inanzi e thiyo thambe.

20 Nyaongike thiyake thavala vambe i vivako mava thi ghambugha Loi ghalinae, na e mbanjagiko thiyako Loi weiye le riwouda mbanja Nowa vamba i vatavatada le wangama. E wangako tine vambe theghewa enge thi vaidiya vamoru e thothoko tine.

21 Na thothoko iyako iye nono i ghimara menake noroke bapitaiso, iye i vamoruinda. Ra

vaidiya vamoru kaiwae Jisas Kraiis tevambe i thuweiruva mare e tine. Bapitaiso ma ghar-erenuwana ngoreiye i thavwiyathu mbighi e riwandake, ko iyemaenge ghinda e gharenda emunjoru ra dagerawe weya Loi ghinda Jisas Kraiis gharaghambu emunjoru.

²² Iye kaerova i viva e ghamwanda e buruburu na ina Loi e nimaеke e uneke, i mbaronangiya nyao thovuthovuye na buruburu gharayakuyaku thiye e lenji mbaro na thi vurigheghe thi yayaku ele mbaro raberabe.

4

Yakuyaku thovuye Loi kaiwae

¹ Iya kaiwae, kaiwae va i ghatanaghathi vuyowo mbunima na madibe ele valivanga ghinda kaiwanda, mbala ra mbela le renuwana, kaiwae thela thongo i ghatanaghathigha vuyowo mbunima na madibe e lenji valivanga iye kaero i roiteta thari.

² E mbanake iyake na i ghaoko lemi yakuyaku e yambaneke yawaliye mbe ngoreiye vara Loi le renuwana na thava ngoreiya mbunima na madibe lenji renuwana.

³ Kaero mbanja molao moli lemi yakuyaku ngoreiya thiye ma ralonwelonweghathi lenji yakuyaku. Lemi renuwana vambe ina vara thegha na gamaina thanavuniye, yathima thanavuniye, munumu, mevathavatha na mwadiwo molamolao, na kururu rarithari moli wenjiya loi vatavatad.

⁴ Ko iyemaenge e mbanake iyake kaero ma hu ru wenjiya thavala ma thi lonweghathi

e ghanjithanavuko ngoreiya thetheghan lenji vakatha e tine, na i vakathanji gharenji i yo laghiye e ghemi na thi utuvathari kaiwami.

⁵ Ko iyemaenge gharighariko thiyako ne thi ndeghati iye e marae, na i ghathanjiya e laghalaghanji na ramaremare.

⁶ Iya kaiwae Jisas Kraiss vambe i utunava Toto Thovuye wenjiya ramaremare. Loi va i vanivanangi ngoreiya va i vakatha wenjiya e laghalaghanji. Va i utunja Toto Thovuye wenji, mbala lenji yakuyaku e yawalinji moli ngoreiya Loi le renuwana.

Yakuyaku thovuye weiye thalavu thovuye

⁷ Yambaneke le ghambako maiyavara. Hu njimbukiki wagiya wenga ghamimberegha na nuwamina mbe inawe vara wenga na hu nanjonango.

⁸ Bigi laghiye moli, e gharemina laghiye hu vemwaewo e ghemi, kaiwae gharevatomwe i teniyathunjiya thari lemoyo.

⁹ Lemi ngolongolona mbala ngoreiya ranama, “Ngolo mavanamavana,” na thava hu veliya ghamiutu.

¹⁰ Ghemi regha na regha, ngoramiya ranjimbunjimbu thovuye Loi ele giya bwagabwaga regha na regha e ghemi, na regha na regha tembe i vakaiwona iya ghagiya bwagabwagako iyako taulaghike lenji thovuye kaiwae.

¹¹ Thela thonjo i vavaghare mbe i vavagharena Loi ghamberegha ghalinae, thela thonjo i kaiwona ekelesiya le kaiwo mbe i kaiwo ngoreiya le vurigheghena Loi i giyanawe, mbala

ele vakathanḡiko wolaghiye e tine Loi ghatarawa i ranḡi Jisas Kraiḡ e idae, na amalaghiniyewe vwenyevwenye na vurigheghe thi menawe, mbanake wolaghiye. Mbwana ḡgoreiye.

Vuyowo ghanjighatanaghati

¹² Lo bodaboda na valigharegharenḡu, thava gharemi i yo mbanḡ ghamino vuyovuyowoniye i yomara e ghemi, thava lemi renuwanḡ hu munjeva bigi ma hu ghareghare i yomara e ghemi.

¹³ Ko mbema hu warari enḡe kaiwae Kraiḡ ghavuyowo mboro iya hu wona, mbala warari laghiye i riyevanjaranḡa mbanḡ ne i njoghama na hu thuweya le vwenyevwenye i yomara.

¹⁴ Hu warari laghiye thonḡo thi utuvathari e ghemi kaiwae ghemi Kraiḡ gharaghambunḡi kaiwae Loi Une vurivurighegheniye ina e ghemi.

¹⁵ Thonḡo ghemi regha i vaidiya vuyowo thava kaiwae na i gabo, i kaivi o thari gharavakatha o raghimara dowedowe.

¹⁶ Ko iyemaenḡe, hu vaidiya vuyowo kaiwae ghemi ralonḡwelonḡweghathi, ne hu ndemonjinaḡa, ko mbema hu vata agowe enḡe weya Loi kaiwae Kristiyana* ghemi.

¹⁷ Tututhi ghambanḡa maiyavara, na Loi le gharighari ne i tuthikaḡḡi. Thonḡo tututhi ne i vivakai e ghinda, ḡgoronḡa ne ghanjighanḡoghanḡo mbanḡ ne ve vakathavao wenḡiya thavala ma thi lonḡweghathigha Toto Thovuye i mena weya Loi?

* **4:16** Kristiyan gharumwaru ḡgoraiyake: “lolo regha iye i ghambughā Jisas Kraiḡ.”

18 Ngoreiya Buk Boboma le woranjiya, inja,
 “Thongo i vuyowo moli wenjiya gharighari
 thovuthovuye na thi vaidiya vamorur,
 thavala ma thi woraweya Loi ghamidi
 na thari gharavakathanji ngoronga ne
 ghanjighangoghanjo?”

19 Iya kaiwae, thavala thi vaidiya vuyowo
 kaiwae Loi le renuwana ngoreiye kaiwanji,
 mbala weiye lenji vakatha thovuye, ghanjim-
 beregha thi vareminje moliya ghanji Ravakatha,
 iye mbanake wolaghiye i renuwanakikiya le
 dagerawe.

5

Randeviva utuninji

1 Ghino, ekelesiya ghagiyagiya regha, ya
 vanuwoviringa ghemi ekelesiya ghagiyagiya e
 valivanjana thiyena. Ghino va ya thuwe e
 marangu vuyowoko va i yomarako weya Krais
 na ghino tembene ya ruweva mbanja ne i yomara
 ele vwenyevwenye vurighegheniye tine. Ya
 nanjo e ghemi

2 hu tabo na sip gharanjimbunjimbu. Hu
 njimbukikingiya sipina iya Loi va i bigirawena e
 ghemi weiye lemi gharevatomwe, ngoreiya Loi
 le renuwana, na thava weiye lemi riwobane.
 Thava hu kaiwo kaiwae ne hu mbana modae, ko
 iyemaenge hu kaiwo weiye lemi gharevatomwe
 emunjoru moli.

³ Lemi mbarona thava i rovarivarĩngiya thavala inanzi e raberabemi, ko mbema hu tabo enge na ghemi lenji ghamba thuwathuwa.

⁴ Na mbanja sip gharanjimbunjimbu laghiyena emunjoru ne i yomara, ne i wovenga modo thovuye moli na memeghabananiye.

⁵ Tembe ngoreiyeva ghemi tabogha, mbe hu vatomwenga moli wengiya randeviva. Taulaghina ghemi hu ghavathana gharenja, na hu vethalathalavunga; kaiwae Buk Boboma ĩna, “Loi i botewoyathũngiya sirari gharĩgharĩniye na i thovuye wengiya thavala thi gharenja.”

⁶ Iya kaiwae ghemi regha na regha weimi lemi gharenja hu yayaku Loi ele vurigheghe tine, na mbala mbe ghamberegha vara i wovorenanga e ghambanja thovuye.

⁷ Ghamivuyowongina wolaghiye hu bigirawe, kaiwae mbe ghare vara wenga.

⁸ Hu vakaiwona umbalimi na hu roviri romara! Ghami thĩghiya, nyao raithari, Seitan, i longa na mbe mara enge ngoreiya thetheghan laiyan bada i ghari, i tamweya ghalolo na i unighi.

⁹ Hu ndeghathi vurigheghe e lemi lonweghathina, kaiwae hu ghareghare lemi valiralonwelonweghathi e yambaneke laghiye thiye tembe thi ruwova vuyowongina thiyena.

¹⁰ Ko iyemaenge Loi, iye raghareviri laghiye, kaerova i kula e ghemi na hu yaku ele vwenyevwenye tine mbanake wolaghiye kaiwae hu tubwe weya Krais, na hu vaidiya vuyowo e mbanja vavana tine. Vuyowongike

thiyake e ghereiye amalaghiniye ghamberegha ne i vakathanja na hu vaidiya yawalimi moli, na i vakatha lemi lonweghathina i laghiye, i vurigheghe na e righerighe.

¹¹ Loi le mbaro i meghabana. Mbwana. Ngoreiye.

Utu ghaghegovun

¹² Sailas le thalavu e ghino ya roriya letake ubotu iyake na i ghaona e ghemi. Loloke iyake ghathanavu e yawaliye ngoreiya ghaghanju na lo vareminje inawe. Nuwanjuiya ya vavurigheghenjanja na ya utuja e ghemi, iyake Loi le ghareviri emunjoru, na hu ndeghathiwe weiye lemi vurigheghe.

¹³ Oghaghami na valigharegharemi, ekelesiya Babilon, vambe i tuthiva ngoreiye ghemi, thi variya lenji gharemwaewo e ghemi na tembe ngoreiyeva narungu Mak.

¹⁴ Regha na regha hu vethinivairinja weiye lemi rabi thovuye.

Thavala ghemi hu tubwe weya Krais, ya nanjo weya Loi na le gharemalili i yaku e ghemi.

Toto Thovuye Loi Ghalinae
Portions of the Holy Bible in the Sudest language of
Papua New Guinea
Buk Baibel long tok ples Sudest long Niugini

copyright © 2014 Wycliffe Bible Translators, Inc.

Language: Sudest

Dialect: Tagula

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-09-23

PDF generated using Haiola and XeLaTeX on 28 Dec 2024 from source files dated 31 Aug 2023

7a63d67b-b890-5db0-8880-b6fd64f3b62f